

四庫全書

集部

欽定四庫全書

集部  
花草粹編卷十九

詳校官編修<sub>臣</sub>周瓊

侍讀<sub>臣</sub>孫球覆勘

總校官檢討<sub>臣</sub>何思鈞

校對官典簿<sub>臣</sub>劉景岳

謄錄監生<sub>臣</sub>陳寶

欽定四庫全書

花草粹編卷十九

明 陳耀文 輯

長調

慶清朝

踏青

王通叟

調雨為酥催冰做水東風分付春還何人便將輕暖點  
破殘寒結伴踏青去好平頭鞋子小雙鸞烟柳外望中  
秀色如有無間 晴則箇陰則箇餽飮得天氣有許多

般須教撩花撥柳爭要先看  
不道吳綾繡襪香泥斜沁  
幾行斑東風巧盡收翠綠  
吹在眉山

上樓大參

李居厚

天啓重光地鍾上瑞有人起  
自東山當年謝傳幾曾鶴  
髮貂冠不似文章雋老重來  
鳴步斗樞間洪鈞轉五原  
草綠太白兵閒 運慶今朝  
初度正日添紋線月掛冰  
盤恩重御壺宣勸喜溢天  
顏聽取沙隄好語金科紅  
篆押千官春長在調元鼎  
裏不假還丹

前調

李易安

禁幄低張彤欄巧護就中獨占殘春容華淡竚綽約俱  
見天真待得羣花過後一番風露曉粧新妖嬈艷態妬  
風笑月長殢東君 東城邊南陌上正日烘池館競走  
香輪綺筵散日誰人可繼芳塵更好明光宮殿幾枝先  
近日邊勾金樽倒拚了盡燭不管黃昏

倦尋芳

春景

王元澤

露晞向曉簾幙風輕小院閑晝翠逕鶯來鶯下亂紅鋪

繡倚危樓登高榭海棠着雨胭脂透  
美韶華又因循過了清明時候  
倦游燕風光滿目好景良辰誰共攜手  
恨被榆錢買斷兩眉長鬪憶得高陽人散後落花流水  
仍依舊這情懷對東風盡成消瘦

春閨

潘元質

一作蘇養直

獸鏤半掩鴛甃無塵庭院瀟灑樹色沈沈春盡燕嬌鶯  
姁夢草池塘青漸滿海棠軒檻紅相亞聽簫聲記秦樓  
夜約彩鸞齊跨  
漸迤邐更催銀箭何處貪歡猶繫嬌

馬旋剪燈花兩點翠眉誰畫香滅羞回空帳裏月高猶  
在重簾下恨疎狂待歸來碎揉花打

春思

盧申之

香泥壘燕密葉巢鶯春暗寒淺花徑風柔着地舞裊紅  
軟鬪草煙欺羅袂薄秋千影落春游倦醉歸來記寶帳  
歌慵錦屏香煖 別來悵光陰容易還又荼蘼牡丹開  
偏妬恨疎狂那更柳花迎面鴻羽難憑芳信短長安猶  
近歸期遠倚危樓但鎮日繡簾高捲

餞周糾定夫

吳君特

暮帆挂雨冰岸飛梅春思零亂送客將歸偏是故宮離  
苑醉酒曾同涼月舞尋芳還隔紅塵面去難留悵芙蓉  
路窄綠楊天遠 便繫馬鶯邊清曉烟草晴花沙潤香  
軟爛錦年華誰念故人游倦寒食相思隄上路行雲應  
在孤山畔寄新吟莫空回五湖春鴈

玉簫涼

史邦卿

秋是愁鄉自錦瑟斷絃有淚如江平生花裏活奈舊夢

難忘藍橋雲樹正綠料抱月幾夜眠香河漢阻但鳳音  
傳恨欄影敲涼新妝蓮嬌試曉梅瘦破春因甚却扇  
臨窓紅巾銜翠翼早弱水茫茫柔情各自未剪問此去  
莫負王昌芳信準更敢尋紅杏西廂

燕春臺

張子野

麗日千門紫烟雙闕瓊林又報春回殿閣風微當時去  
燕還來五侯池館屏開探芳非走馬天街重簾人語鱗  
鱗車幟遠近輕雷雕觴霞灩翠幙雲飛楚腰舞柳宮

面粧梅金猊夜煖羅衣暗裏香煤洞府人歸笙歌燈火  
樓臺下蓬萊猶有花上月清影徘徊

夏初臨

初夏

劉巨濟

泛水新荷舞風輕燕園林夏日初長庭樹陰濃雛鶯學  
弄新簧小橋飛蓋入橫塘跨青蘋綠藻幽香朱欄斜倚霜  
紈未搖衣袂先涼歌歡稀遇怨別多同路遙水遠煙  
淡梅黃輕衫短帽相攜洞府流觴況有紅粧醉歸來寶  
蠟成行拂牙牀紗廚半開月在迴廊

逍遙樂

黃魯直

春意漸歸芳草故國佳人千里信沈音杳雨潤烟光晚  
景澄明極目危闌斜照夢當年少對尊前上客鄒枚小  
鬢燕趙共舞雪歌塵醉裏談笑花色枝枝爭好鬢絲  
年年漸老如今遇風景空瘦損向誰道東君幸賜天幕  
翠遮紅遠休休醉鄉岐路華胥蓬島

迷神引

述懷

柳耆卿

一葉扁舟輕帆捲暫泊楚江南岸孤城暮角引胡笳怨

水茫茫平沙鴈旋驚散煙斂寒林簇畫屏展天際遙山  
小黛眉淺 舊賞輕拋到此成游宦覺客程勞年光晚  
異鄉風物忍蕭索當愁眼帝城賒秦樓阻旅魂亂芳草  
連空闊殘照滿佳人無消息斷雲遠

朱雍

白玉樓高雲光繞望極新蟾同照前村暮雪霽梅林道  
澗風平波聲渺喜登眺疎影寒枝裊太春早臨水凝清  
淺靚粧巧 瘦體傷離向此縈懷抱覺壁華輕冰痕小

倦聽塞管轉嗚咽  
令人老  
素光回  
長亭靜  
無塵到  
烟鎖  
橫塘暖  
香徑悄  
飛英難  
拘束  
任春曉

長亭怨慢

姜堯章

漸吹盡枝頭香絮  
是處人家綠深門戶  
遠浦縈回暮帆  
零亂向何許  
閱人多矣  
誰得似長亭樹  
樹若有情時  
不會得青青如此  
日暮望高城不見  
只見亂山無數  
章郎去也  
怎忘得玉環分付  
第一是早早歸來  
怕紅萼無人為主  
筭只有并刀難剪  
離愁千縷

黃鸝遶碧樹

周美成

雙闕籠嘉氣，寒威日晚。歲華將暮，小院閒庭，對寒梅照雪。淡烟凝素。忍當迅景，動無限、傷春情緒。猶賴是、上苑風光，漸好芳容將煦。草萊蘭芽漸吐，且尋芳、更休思慮。這浮世、甚驅馳、利祿奔競。塵土縱有，魏珠照乘，未買得流年住。爭如盛飲流霞，醉偎瓊樹。

帝臺春

春恨

李景元

芳草碧色萋萋，遍南陌飛絮亂紅也。似知人、春愁無力。

憶得盈盈拾翠侶共攜賞鳳城寒食到今來海角逢春  
天涯行客愁旋釋還似織淚暗拭又偷滴謾倚遍危  
闌儘黃昏也只是暮雲凝碧拚則而今已拚了忘則怎  
生便忘得又還問鱗鴻試重尋消息

瑤臺第一層

上元危躡  
墨莊漫錄

宋宗室仲御

嶰管聲催人報道嫦娥步月來鳳燈鸞炬寒輕簾箔  
光泛樓臺萬年正春未老更傍那日月蓬萊從仙仗看  
星河銀界錦繡天街歡陪千官萬騎九霄人在五

雲堆赭袍光裏星球宛轉花影徘徊未央宮漏水散異  
香龍闕崔嵬翠輿回奏仙韶歌吹寶殿尊壘

賢良朱雍

西母池邊宴罷贈南真步玉霄緒風和扇冰華發秀雪  
質孤高漢波澄練影問是誰獨立江臯便凝望認壺中  
圭璧天上瓊瑤清標曾陪勝賞坐忘愁斛醉使塵  
銷况雙成與乳丹點深都付香梢壽粧酥冷郢韻珮舉  
麝捲雲綃樂逍遙鳳皇臺畔憶取吹簫

碧芙蓉

亦名  
尾犯

柳耆卿

晴烟冪冪漸東郊芳草染成輕碧野塘風暖游魚動觸  
冰漸微坼幾行斷鴈旋次第歸霜磧詠新詩手撚江梅  
故人贈我春色 似此光陰催逼念浮生不滿百雖照  
人軒冕潤屋金珠於身何益一種勞心力圖利祿殆非  
長策除是恁點檢笙歌訪尋羅綺銷得

晝夜樂

洞房記得初相遇便只合長相聚何期小會幽懽變作

別離情緒況值闌珊春色暮對滿目亂花狂絮直恐好  
風光盡隨伊歸去一場寂寞憑誰訴美前言摠輕負  
早知恁地難拚悔不當初留住其奈風流端正外更別  
有繫人心處一日不思量也攢眉千度

二

秀香家住桃花徑算神仙才堪並層波細剪明眸膩玉  
圓搓素頸愛把歌喉當筵逞過天邊亂雲愁凝言語似  
嬌鶯一聲聲堪聽洞房飲散簾幃靜擁香衾懽心稱

金爐麝裊青烟鳳帳燭搖紅影無限狂心乘酒興這歡  
娛漸入嘉境猶自怨隣鷄道秋宵不永

山谷

夜深記得臨歧語說花時歸來去教人每日思量到處  
與誰分付其奈冤家無定據約雲朝又還雨暮將淚入  
鴛衾總不成行步元來也解知思慮一封書深相許  
情知玉帳堪歡為向金門進取直待腰金拖紫後有夫  
人縣君相與爭奈會分疎沒嫌伊門路

春草碧

俗呼中管高

万俟雅言

又隨芳緒生看翠連霽空愁遍征路東風裏誰望斷西  
塞恨迷南浦天涯地角意不盡消沈萬古曾是送別長  
亭下細綠暗煙雨何處亂紅鋪繡茵有醉眠蕩子拾  
翠遊女王孫遠柳外共殘照斷雲無語池塘夢生謝公  
後還能繼否獨上畫樓春山暝鴈飛去

飛龍宴

蘇小娘

吳七郎王姬

炎炎暑氣時流光閃爍間  
局深院水閣涼亭半開簾幙

遙觀灼灼榴花吐豔細雨洒小荷香淺樹陰竹影清涼  
瀟洒枕簟搖紈扇堪嘆浮世忙如箭對良辰歡樂莫  
辭頻勸遇酒逢歌恣情遂意迷戀須信人生聚奈區區  
利牽名絆少年未倦良天皓月金樽滿

夏日燕巒堂

雅詞拾遺

日初長正園林換葉瓜李飄香簾外雨過送一霎微涼  
萍蕪逕曲凝珠顆襯汀沙細簇蜂房被晚風輕颭圓荷  
翻水潏覺鴛鴦此景最難忘稱芳樽泛蟻筠簟鋪

湘蘭舟棹穩倚何處垂楊豈能文字成狂飲更紅裙間  
也何妨任醉歸明月蝦鬚簾篩幾線餘霜

十月桃

樂府雅詞

東籬菊盡徧園林敗葉滿地寒荻露井平明破香籠粉  
初開佳人共喜芳意呵手剪密插鸞釵無言有豔不避  
繁霜變作春媒 問武陵溪上誰栽分付與南國舞榭  
歌臺恰似凝酥襯玉點綴裝裁東君自是為主先煖信  
律管飛灰從今雪裏一番花休話江梅

十月梅

梅苑

千林凋盡一陽未報已綻南枝獨對霜天冒寒先占花  
期清香映月浮動臨淺水疎影斜欹孤標不似綠李天  
桃取次成蹊縱壽陽粧臉偏宜應未笑天然雅態冰  
肌寄語高樓凭欄羌管休吹東君自是為主調鼎鼎終  
付他時從今點綴百草千花須待春歸

芰荷香

万俟雅言

小瀟湘正天影倒碧波面容光水仙朝罷間列綠蓋紅

幢吹風細雨蕩十頃浥浥清香人在水精中央霜綃霧  
縠襟袂收涼 欸放輕舟鬧紅裏有蜻蜓點水交頸鴛  
鴦翠陰密處曾覓相並青房晚霞散綺泛遠淨一葉  
鳴榔擬去儘促凋觴歌雲未斷月上飛梁

朱希真

遠尋花正風亭霽雨烟浦移沙緩提金勒路擁桃葉香  
車憑高悵飲照羽觴晚日橫斜六朝浪語繁華山圍故  
國綺散餘霞 無奈尊前萬里客歎人今何在身老天

涯壯心零落怕聽疊鼓慘楓江浮醉眼望浩渺空想靈  
槎曲終淚濕琵琶誰扶上馬不省還家

並蒂芙蓉

晁端禮

能改齋漫錄

太液波澄向鑑中照影芙蓉同蒂千柄綠荷深並丹臉  
爭媚天心眷臨聖日殿宇分明敞嘉瑞弄香嗅蕊願君  
王壽與南山齊比池邊屢回翠輦擁羣仙醉賞憑欄  
凝思夢綠攬飛瓊共波上游戲西風又看露下更結雙  
雙新蓮子鬪裝競美問鴛鴦向誰留意

水晶簾上定

齊

東軒

誰道秋期遠更旬  
淡雙星相見雨足西簾正玉井蓮開  
壽筵初展塵尾呼風祛暑淨那更着綸巾羽扇  
簪清歌不記杯行任深任淺  
湖邊小池苑漸苔痕竹色青青  
如染辨橘中荷屋晚芳自占蝸角虛名身外事付散  
子紛紛戲選喜時平公道開明話頭正轉

福壽千春

慶黃  
排岸

梅坡

柳暗三眠  
棠翻七莢  
稟昂蕭生時叶  
信道鳳毛池上種

却勝河東鶴薦薦志典墳經旨素得歐陽學妙文章  
赴飛黃姓名即登鴈塔 要成發軔勲業便先教濟川  
整頓舟楫兆朕于今須從此超遷榮膺異渥他日趨裝  
事待還鄉懽洽頌枌觴祝遐筭壽同龜鶴

雨中花慢

張安國

一葉凌波十里御風烟鬟雨鬢蕭蕭認得江皋玉珮  
水館冰綃秋淨明霞乍吐曙涼宿靄初消恨微顰不  
語欲進還休凝竚迢遙 神交冉冉愁思盈盈斷魂欲

遣誰招還似待青鸞傳信烏鵲成橋悵望胎仙琴疊  
羞看翡翠蘭苔夢回人遠紅雲一片天際笙簫

牡丹菊

東坡

今歲花時深院盡日東風蕩颺茶烟但有綠苔芳草  
柳絮榆錢聞道城西長廊古寺甲第名園有國豔帶  
酒天香染袂為我留連 清明過了殘紅無處對此淚  
酒樽前秋向晚一枝何事向我依然高會聊追短景清  
商不假餘妍不如留取十分春態付與明年

前調

吳子和

春濃恩重長離水別憑誰為返香魂憶湘裙霞袖杏臉  
櫻唇眉掃春山淡淡眼裁秋水盈盈便如何忘得溫柔  
情態恬靜天真 凭闌念及夕陽西下暮煙四起江村  
漸入夜疎星映柳新月籠雲醞造一生清瘦能消幾箇  
黃昏斷腸時候簾垂深院人掩重門

春日旅况

劉伯寵

縹緲細枝玉葉翡翠百梢爭趁春忙正雨後蜂粘落絮

燕撲晴香遺策誰家蕩子唾花何處新粧想流紅有  
恨拾翠無心往事淒涼 春愁如海客思翻空帶圍  
只看東陽更那堪玉笙度曲翠羽傳觴紅淚不勝閨怨  
白雲應老他鄉夢回羈枕風驚庭樹月在西廂

前調

張才翁

萬縷青青初眠官柳向人猶未成陰據征鞍無語擁鼻  
微吟遠宦情懷誰問空勞壯志銷凝好花時節山城留  
滯又負歸心 別離萬里飄蓬無定誰念會合難憑相

聚裏莫辭金盞酒淺還深欲把春愁抖擻春愁轉更難  
禁亂山高處凭欄垂袖聊寄登臨

才翁風韻不羈初任臨邛秋官張公庠待之不厚會  
有白鶴之游郡守率屬官同往才翁不預乃語官妓  
楊皎曰老子到彼必有詩詞可速寄來公庠既到白  
鶴便留題曰初眠官柳未成陰馬上聊為擁鼻吟遠  
宦情懷銷壯志好花時節負歸心別離長恨人南北  
會合休論酒淺深欲把春愁間抖擻亂山高處一登  
臨皎錄寄才翁才翁增減作此詞寄皎公庠再坐皎  
歌于公庠之側公庠問之皎前稟曰張司理恰寄來  
令皎歌之以獻台座公  
庠遂青顧才翁尤厚

任昉

事往人離還似暮峽歸雲壠上流泉奈向分圓鏡已斷  
么絃長記酒闌歌罷難忘月夕花前相攜手處瑤樓珠  
戶觸目依然從來慣共繡幃羅帳鎮效比翼文鴛誰  
念我而今清夜常是孤眠入戶不如飛絮傍懷爭及爐  
烟這回休也一生心事為你縈牽

玉照新志云此得廬宣仲有所記謂饒州  
舉子張坐事也或云即知常之子功燾也

辛幼安

馬上三年醉帽吟鞍錦囊詩卷長留悵溪山舊管風月

新收明便關河杳杳去應日月悠悠笑千篇索價未抵  
蒲桃五斗涼州 停雲老子有酒盈尊琴書端可消  
憂渾未解傾身一飽浙米矛頭心似傷弓塞鴈身如喘  
月吳牛曉天涼夜月明誰伴吹笛南樓

孤鸞

早春

馬莊父

沙堤香軟正宿雨初收落梅飄滿可奈東風暗逐馬蹄  
輕捲湖波又還漲綠粉墻陰日融烟暖驀地刺桐枝上  
有一聲春喚 任酒帘飛動畫樓晚便指數燒燈時節

非遠陌上叫聲好是賣花行院玉梅對粧雪柳鬧蛾兒  
象生嬌顫歸去爭先戴取倚寶釵雙燕

早梅

朱希真

天然標格是小萼堆紅芳姿凝白淡竚新粧淺點壽陽  
宮額東君想留厚意倩年年與傳消息昨日前村雪裏  
有一枝先拆念故人何處水雲隔縱駟使相逢難寄  
春色試問丹青手是怎生描得曉來一番雨過更那堪  
數聲羌笛歸去和羹未晚勸行人休摘

雙雙燕

史邦卿

過春社了度簾幕中間去年塵冷差池欲住試入舊巢  
相並還相雕梁藻井又軟語商量不定飄然快拂花梢  
翠尾分開紅影芳徑片泥雨潤愛貼地爭飛競誇輕  
俊紅樓歸晚看足柳昏花暝應自棲香正穩便忘了天  
涯芳信愁損翠黛雙蛾日日畫欄獨凭

黃河清慢

應制  
作

晁次膺

晴景初升風細細雲收天淡如洗望外鳳皇城闕蔥蔥

佳氣朝罷香烟滿袖侍臣報天顏有喜夜來連得封章  
奏大河徹底清泚 君王壽與天齊馨香動上穹頻降  
祥瑞大晟奏功六樂初調宮徵合殿薰風乍轉萬花覆  
千官盡醉內家傳詔重開宴未央宮裏

鉄圍山叢談云宣和初燕樂初成八音告備因作徵  
招角招有曲名黃河清壽香明二者音調極韶美次  
膺作此詞時天下無間遐邇小大雖偉男髻女皆爭  
唱之又有一曲曰深院鎖春風悄無人桃李自笑亦  
歌之遂入  
大晟府

八節長歡

送孫守  
公素

毛澤民

名滿人間記黃金殿舊賜清閑才高鸚鵡賦風凜惠文  
冠波濤何處試蛟鰐到白頭猶守溪山且做龔黃樣度  
留與人看 桃蹊柳曲陰圓離唱斷旌旗却捲春還襦  
袴寄餘溫雙石畔唯聞吏膽長寒詩翁去誰細遠屈曲  
欄干從今後南來幽夢應隨月度雲端

登高詞

澤國秋深繡楹天近坐久覓清溪山遠樽酒雲霧浥衣  
襟餘霞孤鴈送愁眼寄寒閨一點離心杜陵老兩峯秀

處短髮疎巾 佳人為折寒英羅袖濕真珠露冷鈿金  
幽豔為誰妍東籬下却教醉倒淵明君但飲莫覩他落  
日蕪城從教夜龍山明月端的解留人

李錦標

送李  
景山

應滕賓

越嶠  
志

老氣盤空才名照萬里西風行色人物朝中第一司馬  
題橋班超投筆記承流宣化早威聲先馳殊域看吟鞭  
笑指闕河歷當年曾識 自古人心忠義百水朝東衆  
星拱極銅柱無端隔斷天南天北念瞻丹闕捧紅雲金

泥香調屑明年歸對西山細說安邊策

應天長慢

寒食

周美成

條風布暖霏霧弄晴池塘徧滿春色正是夜堂無月沈  
沈暗寒食梁間燕前社客似笑我閉門愁寂亂花過隔  
院芸香滿地狼籍長記那回時邂逅相逢郊外駐油  
壁又見漢宮傳燭飛煙五侯宅青青草迷路陌強載酒  
細尋前跡市橋遠柳下人家猶自相識

閨情

康伯可

管絃繡陌燈火畫橋塵香舊時歸路腸斷蕭娘舊日風  
簾映朱戶鶯能舞花解語念後約頻成輕負緩雕轡獨  
自歸來凭闌情緒 楚岫在何處香夢悠悠花月更誰  
主惆悵後期空有鱗鴻寄紉素枕前淚窓外雨翠幙冷  
夜涼虛度未應信此度相思寸腸千縷

蘇堤春曉

西湖  
十景

張矩

曙林帶暝晴靄弄霏鶯花未認游客草色舊迎雕輦  
蒙茸暗香陌秋千架間曉索正露濕繡鴛痕窄費人

省隔夜濃歡醒處先覺  
重過湧金樓畫舫紅旌催向  
斷橋泊又怕晚天無準東風妬芳約垂楊岸今勝昨水  
院近占春光酌恁時候不道歸來香斷燈落

平湖秋月

候蛩探暝書鴈寄寒西風暗剪綃織報道鳳城催鑰笙  
歌散無跡冰輪駕天緯逼漸欸引素娥游歷夜粧靚獨  
展菱花淡綃秋色  
人在湧金樓漏迴繩低光重袖香  
滴笑語又驚栖鵲南飛傍林間孤山影波共碧向此際

隱逋如識夢仙游倚徧霓裳何處聞笛

斷橋殘雪

甃澌亘曉篙水漲漪孤山漸捲雲簇又見岸容舒臘菱  
花照新沐橫斜樹香未北倩點綴數梢疎玉斷腸處日  
影輕消休怨霜竹簾上湧金樓酒豔酥融金縷試春  
曲最好半殘鵲登臨快心目瑤臺夢春未足更看取  
灑窓填屋潮橋外柳下吟鞭歸趁游燭

雷峯落照

啓圓樹杪舟亂柳津斜陽又滿東角可是暮情堪翦平  
分付烟郭西風影吹易落認滿眼脆紅先爍筭惟有塔  
起半輪千載如昨誰信湧金樓此際憑闌人共楚天  
約準擬換樽陪月層空捲塵幙飛鴻倦低未泊鬪倒指  
數來還錯笑聲裏立盡黃昏剛道愁惡

麴院風荷

換橋渡舫添柳護堤坡僂舊欠今續四面水窓如染香  
波釀春麴田田處成暗綠正萬羽背風斜矗亂鷗去不

信雙鴛午睡猶熟 還記湧金樓共撫雕闌低度浣沙  
曲自與故人輕別榮枯換涼燠亭亭影驚豔目忍到  
手又成輕觸悄無語獨撚花鬚心事曾卜

花港觀魚

岸容浣錦波影墮紅纖鱗巧避鳬唼禹浪未成頭角吞  
舟膽猶怯湖山外江海匝怕自有暗泉流接楚天遠尺  
素無期枉語停楫 回望湧金樓帶草蠻烟縹緲際城  
堞漸見暮榔敲月輕舫亂如葉濠梁興歸未愜記舊伴

袖攜留掐指魚水總是心期休怨三疊

南屏晚鐘

翠屏對晚鳥榜占隄鐘聲又歛春色幾度半空敲月山  
南應山北歡娛地空浪迹謾記省五更聞得洞天曉夾  
柳橋疎穩縱香勒前度湧金樓嘯傲東風鷗鷺半相  
識暗數院僧歸盡長虹卧深碧花間恨猶記憶正素手  
暗裁輕折夜深後不道人來燈細窓隙

柳浪聞鶯

翠迷倦舞紅駐殘粧流鶯怕與春別過了禁煙寒食東  
風顫環鐵游人恨柔帶結更喚醒羽喉宮舌畫船遠不  
認綿蠻晚棹空歌 爭似湧金樓燕燕歸來鈎轉暮簾  
揭對語畫梁消息香泥砌花屑昆明事休更說費夢繞  
建章宮闕曉啼處穩繫金狨雙鐙籠月

三潭印月

桂輪逼彩菱沼漾金潛虬暗動鮫室水路乍疑霜雪明  
昨洗春色年時事還記憶對萬頃葑痕龜坼舊游處不

認三潭此際曾識 今度湧金樓素練紫窓頻照庾  
侯席自與影娥人約移舟弄空碧宵風悄籤漏滴早未  
許睡魔相覓有時恨月被雲妨天也拚得

兩峯插雲

暮屏翠冷秋樹赭疎雙峯對起南北好與霽天相接浮  
圖現西極苔堯處雲共碧謾費盡少年游屐故鄉遠一  
望空遙水斷煙隔 閒凭湧金樓漱澹波心如洗夢淹  
筆喚起睡龍蒼角盤空壯商色西湖路成倦客待倩寫

素纈千尺便歸去酒底花邊猶自省得

雲僊引

桂花

馮偉壽

紫鳳臺高紅鸞鏡裏翻翻幾度秋馨黃金重綠雲輕  
丹砂鬢邊滴栗翠葉玲瓏烟剪成含笑出簾月香滿袖  
天霧縈身年時花下逢迎有遊女翩翩如五雲亂擲  
芳英為簪斜朶事事關心長向金風一枝在手嗅蕊  
悲歌雙黛顰遠臨溪樹對初弦月露下更深

繡停針

陸務觀

歎半紀跨萬里秦吳頓覺衰謝回首鵷行英俊並游咫尺玉堂金馬氣凌嵩華負壯畧縱橫王霸夢經洛浦梁園覺來淚流如瀉  
山林定去也却自恐說著少年時話靜院焚香閒倚素屏今古總成虛假趁時婚嫁幸自有湖邊茅舍燕歸應笑客中又還過社

瓊瓏四犯

春思

周美成

穠李夭桃是舊日潘郎親試春豔自別河陽長負露房烟臉憔悴鬢點吳霜念想夢魂飛亂嘆畫欄玉砌都換

纔始有緣重見  
夜深偷展香羅薦  
暗牕前醉眠葱蒨  
浮花浪蕊都相識  
誰更曾擡眼  
休問舊色舊香  
但認取芳心一點  
又片時一陣風雨  
惡吹分散

京口寄所思

史達祖

闊甚吳天  
頓放得離緒  
江南多少一雨為秋  
涼氣小牕先到  
輕夢聽徹風蒲  
又散入楚空清曉  
問世間愁在何處  
不離澹烟芳草  
簾紋獨浸芙蓉影  
想淒淒欠郎偎抱  
即今卧得雲衣冷  
山月仍相照  
方悔翠袖易分難聚

有玉香花笑待鴈來先寄新詞歸去且教知道

越中歲暮聞簫鼓感懷

姜堯章

疊鼓夜寒垂燈春淺匆匆時事如許倦游歡意少俛仰  
悲今古江淹又吟恨賦記當時送君南浦萬里乾坤百  
年身世惟有此情苦 揚州柳垂官路有輕盈喚馬端  
正窺戶酒醒明月下夢逐潮聲去文章信美知何用謾  
贏得天涯羈旅教說與春來要尋花伴侶

金菊對芙蓉

東坡

花則一名種分三色嫩紅妖白嬌黃正新秋佳景雨霽  
風涼郊墟十里飄蘭麝瀟瀟洒洒處旖旎非常自然風韻開  
時不惹蝶亂蜂狂 攜酒獨揖蟾光問花神何屬離兌  
中央引騷人乘興廣賦詩章幾多才子爭攀折嫦娥道  
三種清香狀元紅是黃為榜眼白探花郎

秋怨

康伯可

梧葉飄黃萬山空翠斷霞流水爭輝正金風西起海燕  
東歸凭欄不見南來鴈望故人消息遲遲木樨開後不

應恨我好景良時  
只念獨守孤幃把枕前囑付一旦  
分飛上秦樓游賞酒殢花迷誰知別後相思苦悄為伊  
瘦損香肌花前月下黃昏院落珠淚偷垂

前調

劉靜甫

淺拂春山慢橫秋水玉纖閑理絲桐按清冷繁露淡竚  
悲風素絃瑤軫調新韻顫翠翹金簇芙蓉疊鈎重鎖  
輕挑慢摘特地情濃  
泛商刻羽無窮似和鳴鸞鳳律  
應雌雄問高山流水此意誰同箇中只許知音聽有茂

陵車馬雍容晝簾人靜琴心三疊時倒金鐘

月華清

憶別

馬莊父

瑟瑟秋聲蕭蕭天籟滿庭搖落空翠數徧丹楓不見  
葉間題字人何處千里嬋娟愁不斷一江流水遙睇見  
征鴻幾點碧天無際 悵望月中仙桂問竊藥佳人誰  
與同歲把鏡當空照盡別離情意心裏恨莫結丁香琴  
上曲休彈秋思怕裏又悲來老却蘭臺公子

春夜對月

洪叔璚

花影搖春蟲聲吟暮九霄雲幕初捲誰駕冰蟾擁出桂  
輪天半素魄映青瑣窓前皓彩散畫欄干畔凝盼見金  
波晃漾分輝鵲殿況是風柔夜暖正燕子新來海棠  
微綻不似秋光只照離人腸斷恨無奈利鎖名韁誰為  
喚舞裙歌扇吟玩怕銅壺催曉玉繩低轉

梨花

朱淑真

雪壓庭春香浮花月攬衣還怯單薄歎枕徘徊又聽一  
聲乾鵲粉淚共宿雨闌干清夢與寒雲寂寞除却是

江梅曾許詩人吟作  
長恨曉風漂泊且莫遣香肌瘦  
減如削深杏天桃端的為誰零落況天氣粧點清明  
對美景不妨行樂拚着向花時取一杯獨酌

玉蝴蝶

京城

柳耆卿

漸覺芳郊明媚夜來膏雨一洗塵埃滿目淺桃深杏露  
染烟栽銀塘靜魚鱗簾展烟岫翠龜甲屏開殷晴雷  
雲中鼓吹游徧蓬萊徘徊隼旟前後三千珠履十  
二金釵雅俗熙熙下車成宴盡春臺好雍容東山妓

女堪笑傲北海樽壘且追陪鳳池歸去那更重来

秋思

望處雲收雨斷凭欄悄悄目送秋光晚景蕭疎堪動宋  
玉悲涼水風輕蘋花漸老月露冷梧葉飄黃遣情傷故  
人何在烟水茫茫難忘文期酒會幾辜風月屢變星  
霜海濶山遙未知何處是瀟湘念雙燕難憑遠信指暮  
天空識歸航黯相望斷鴻聲裏立盡斜陽

重陽

淡蕩素商行暮遠空雨歇平野烟收滿目江山堪助楚  
客冥搜素光動雲濤漲晚紫翠冷霜巘橫秋景清幽渚  
蘭香謝汀樹紅愁良傳西風吹帽東籬攜酒共結懽  
游淺酌低吟坐中俱是飲家流對殘暉登臨休嘆賞令  
節醕酌方酬且相留眼前尤物盞裏忘憂

春思

晁叔用

目斷江南千里瀾橋一望烟水微茫盡鎖重門人去暗  
惜流光雨輕輕梨花院落風淡淡楊柳池塘恨偏長佩

沈湘浦雲散高唐 清狂重來一夢手搓梅子煮酒新  
嘗寂寞經春小橋依舊燕飛忙玉鈎欄凭多漸煖金縷  
枕別久猶香最難忘看花南陌待月西廂

秋思

高賓王

喚起一襟涼思未成晚雨先做秋陰楚客悲殘誰解此  
意登臨古臺荒斷霞斜照新夢黯微月疎砧總難禁盡  
將幽恨分付孤斟 從今倦看青鏡既遲勲業可負煙  
林斷梗無憑歲華搖落又驚心想尊汀水雲愁凝閑蕙

帳猿鶴悲吟信沈沈故園歸計休更侵尋

前調

史達祖

晚雨未催宮樹可憐殘葉猶抱涼蟬短景歸秋吟思又  
接愁邊漏初長夢魂難禁人漸老風月俱寒想幽歡土  
花庭甃蟲網闌干無端啼蛄攪夜恨隨團扇苦近秋  
蓮一笛當樓謝娘懸淚立風前故園晚強留詩酒新鴈  
遠不致寒暄隔蒼烟楚香羅袖誰伴嬋娟

王忠州家席上作

陸務觀

倦客平生行處墜鞭京洛解佩瀟湘此夕何年來賦宋  
玉高唐繡簾開香塵乍起蓮步穩銀燭分行暗端相燕  
羞鶯妬蝶遶蜂忙難忘芳樽頻勸峭寒新退玉漏猶  
長幾許幽情只愁歌罷月侵廊欲歸時司空笑悶微近  
處丞相嗔狂斷人腸假饒相送上馬何妨

和維揚晁侍郎寄強伯

葛信齋

憶昨苕溪慣弄五亭月笛四水烟蓑何事毗檀門外馬  
駐長坡野花中亂紅香靄小橋外疊翠嵯峨且顏酡但

存長袖舞到婆娑  
云何立盟惠政春行五馬月皎千  
波贏得賓僚聽隔牆無事高歌帳烟寒瑞麟影墮簾霧  
細寶鴨香多試蹉跎一枰落日又送樵柯

燕山亭

杏花

宋徽宗

裁翦冰綃輕疊數重冷淡燕脂勻注新樣靚粧豔溢香  
融羞殺蕊珠宮女易得凋零更多少無情風雨愁苦問  
院落淒涼幾番春暮憑寄離恨重重這雙燕何曾會  
人言語天遥地遠萬水千山知他故宮何處怎不思量

除夢裡有時曾去無據和夢也新來不做

中秋諸王席上作

曾純甫

河漢風清庭戶夜涼皓月澄秋時候水鑑乍開跨海飛  
來先掩滿天星斗四捲珠簾漸移影寶階鴛鴦還又看  
歲歲嬋娟向人依舊 朱邸高宴簪纓正歌吹瑤臺舞  
翻宮袖銀管競酬棟萼相輝風流古來誰有玉笛橫空  
更聽徹霓裳三奏難偶拚醉倒參橫曉漏

三姝媚

史邦卿

烟光搖縹瓦望晴簷多風柳花如洒錦瑟橫牀想淚痕  
塵影鳳絃常下倦出屏帷頻夢見王孫驕馬諱道相思  
偷理綃裙自驚腰袂惆悵南樓遙夜記翠箔張燈枕  
肩歌罷又入銅駝過舊家門巷首詢聲價可惜東風將  
恨與閒花俱謝記取崔徽模樣歸來暗寫

古衛舟人謂曾載錢塘官人 天游詹玉

一蓬兒別苦是誰家花天月地兒女紫曲藏嬌慣錦窠  
金翠玉璫鐘呂綺席傳宣笑聲裏龍樓三鼓歌扇題詩

舞袖籠香幾曾塵土 因甚留春不住怎知道人間匆  
匆今古金屋銀屏被西風將換蓼汀蘋渚如此江山應  
悔却西湖歌舞載取斷雲何處江南烟雨

次周公謹故京送別韻

王沂孫

蘭缸花半綻正西窓淒淒斷螢新鴈別久逢稀謾相看  
華髮共成銷黯總是飄零更休賦梨花秋苑何況如今  
離思難禁俊才都減 今夜山高江淺又月落帆空酒  
醒人遠綵袖烏紗解愁人惟有斷歌幽婉一信東風再

約看紅腮青眼只恐扁舟西去頻花弄晚

鎖寒窓

寒食

周美成

暗柳啼鴉單衣竚立小簾朱戶桐花半畝靜瑣一庭愁  
雨洒空階更闌未休故人剪燭西窓語似楚江暝宿風  
燈零亂少年羈旅遲暮嬉游處正店舍無烟禁城百  
五旗亭喚酒付與高陽儔侶想東園桃李自春小唇秀  
靨今在否到歸時定有殘英待客攜樽俎

楊補之

柳暗藏鴉花深見蝶物華如綉情多思遠又是一番清  
瘦憶前回庭榭未春箇人預約同攜手恨遲留載酒期  
程孤負踏青時候搔首雙眉暗鬪况無似今年一春  
晴晝風偏雨倦直得迤逗想閒窓針線倦拈寂寞細撚  
醺醺嗅待還家定自寬人淚粉盈襟袖

有感

程先傳之宋  
休寧人

雨洗紅塵雲迷翠麓小車難去淒涼感慨未有今年春  
暮想曲江水邊麗人影沈香歇誰為主但免葵燕麥風

前搖蕩徑花成土 空被多情苦慶會難逢少年幾許  
紛紛沸鼎負了青陽百五待何時重享太平典衣貰酒  
相爾汝筭蘭亭有此歡娛又却悲今古

前調

蕭允之

細雨收塵輕陰弄日柳絲掠道桃邊杏處猶記玉驄曾  
到對東風回首舊游香消豔歇無音耗悵佳人有約難  
來綠遍滿庭芳草 愁抱沈吟久問翠珥金鈿為何人  
好回文細字塵暗當年纖縞倚闌干斜陽又西歡期易

失春易老待何時再覓珍叢共把清樽倒

五福降中天慢

詠梅

沈約之

月朧煙淡霜溪滑孤宿暮林荒驛遠樹微吟巡簷索笑  
自分平生相得冰池半釋正節物驚心淚痕沾臆流水  
濺濺照影古寺滿春色 沈嘆今年未識暗香微動人  
初寂酷愛芳姿最憐幽韻來款禪房深密他時悵悵却  
月凌風信音難的雪底幽期為誰還露立

紫玉簫

韓相家  
姬輕盈

晁無咎

羅綺叢中笙歌筵裏眼狂初認輕盈無花解比似一鉤  
新月雲際初生筭不虛得都占與第一佳名卿歸去那  
知有人別後牽情 襄王自是春夢休謾說東牆事更  
難憑誰教慕宋要題詩曾倚寶柱低聲似瑤臺曉空  
暗想衆裏飛瓊餘香冷猶在小窓一到魂驚

三部樂

周美成

浮玉霏瓊向邃館靜軒倍增清絕夜窓垂練何用交光  
明月近聞道官閣多梅趣暗香未遠凍蘼初發倩誰摘

取寄贈情人桃葉 迴文近傳錦字道為君瘦損是人  
都說遙知染紅着手膠梳粘髮轉思量鎮長墮睫都只  
為情深意切欲報消息無一句堪喻愁結

七月送丘宗卿使敵

陳同父

小窟穹廬但三湍三平其勞均佚人中龍虎本為明時  
而出只合是端坐王朝看指揮整辦掃蕩飄忽也持漢  
節聊過舊家官室 西風又還帶暑把征衫著上有時  
披拂休將看花淚眼間弦缺 骨對遺民有如皎日行萬

里依然故物入奏幾策天下禮終定于一

芳草

古風  
蕭吟

韓玉汝

鎖離愁連綿無際來時陌上初熏繡幃人念遠暗垂珠  
露泣送征輪長行長在眼更重重遠水孤雲但望極樓  
高盡日目斷王孫 消魂池塘別後曾行處綠妬輕裙  
恁時攜素手亂花飛絮裏緩步香裯朱顏空自改向  
年年芳意長新徧綠野嬉游醉眼莫負青春

丁香結

周美成

蒼蘚沿堦冷螢粘屋庭樹望秋先隕漸雨淒風迅澹暮  
色倍覺園林清潤漢姬紈扇在重吟翫棄擲未忍登山  
臨水此恨自古消磨不盡牽引起試酒歸時映月同  
看鴈陣寶幄香纓薰爐象尺夜寒燈暈誰念留滯故  
園舊事勞方寸唯丹青相伴那更塵昏蠹損

眊龍謠

朱希真

肩拍洪崖手攜子晉夢裏暫辭塵宇高步層霄俯人  
間如許筭蝸戰多少功名問蟻聚幾回今古度銀潢展

盡參旗桂華淡月飛去 天風緊玉樓斜舞萬女霓袖  
光搖金縷明廷燕闥倚青冥回顧過瑤池重借雙成就  
楚岫更邀巫女轉雲車指點虛無引蓬萊路

二

憑月攜簫遡空秉羽夢踏絳霄仙去花冷街榆悄中天  
風露並真官蕊珮芬芳望帝所紫雲容與享鈞天九奏  
傳觴聽龍嘯省鸞舞 驚塵世悔平生歎萬感千恨  
誰憐深素羣仙念我好人間難住勸阿母偏與金桃教

酒醒賸斟瓊醕醉歸時手授丹經指長生路

閨怨無悶

程正伯

天與多才不合更與殢柳憐花情分甚總為才情惱人  
方寸早是春殘花褪也不料一春都成病自失笑因甚  
腰圍半減淚珠頻搵難省也怨天也自恨怎免千般  
思忖倩人說與又却不忍拚了一生愁悶又只恐愁多  
無人問到這裡天也憐人看他穩也不穩

雪意

王沂孫

陰積龍荒寒度鴈門西北高樓獨倚悵短景無多亂山  
如此欲喚飛瓊起舞怕攪碎紛紛銀河水凍雲一片藏  
花護玉未教輕墜清致悄無似有照水一枝已攬春  
意誤幾度憑欄莫愁凝睇應是梨花夢好未肯放東風  
來人世待翠管吹破蒼茫看取玉壺天地

月下笛

次韻

曾允元

吹老楊花浮萍點點一溪春色閒尋舊迹認溪頭浣沙  
磧柔條折盡成輕別向空外瑤簪一擲筭無情更苦鶯

巢暗葉題破幽寂 凝立闌干側記露飲東園聯鑣西  
陌容消鬢減相逢應自難識東風吹得愁似海謾點染  
空階自碧獨歸晚解說心中事月下短笛

垂楊

懷古

陳允平

銀屏夢覺漸淺黃嫩綠一聲鶯小細雨輕塵建章初閉  
東風悄依然千樹長安道翠雲鎖玉窓深窈窕斷橋人空  
倚斜陽帶舊愁多少 還是清明過了任烟縷露條碧  
纖青嫋恨隔天涯幾回惆悵蘇堤曉飛花滿地誰為掃

甚薄倖隨波縹緲啼鵑不喚春歸人自老

鴈過粧樓

已巳菊日寓溧陽聞鴈聲因動鵲鵲之感

張炎

偏插茱萸人何處客裏頓頓攜壺鴈影涵秋絕似暮  
雨相呼料得曾留堤上月舊家伴侶有書無謾嗟吁數  
聲怨抑翻致無書一笑飄零萬里更可憐倦翼同此

江湖飲啄關心知是近日何如陶潛謾存徑菊最堪羨  
松風陶隱居沙汀冷揀寒枝不似烟水寒蘆

大有

九日

漁庄潘希白

戲馬臺前採花籬下問歲華還是重九恰歸來南山翠  
色依舊簾櫳昨夜聽風雨都不似登臨時候一片宋玉  
情懷十分衛郎清瘦紅黃佩空對酒砧杵動微寒暗  
欺羅袖秋已無多早是敗荷衰柳強整帽簷歌側曾經  
向天涯搔首幾回憶故國尊鱸霜前鴈後

陌上花

使歸  
有懷

張仲舉

關山夢裏歸來還又歲華催晚馬影鷄聲語盡倦郵荒  
館綠牋密記多情事一看一回腸斷待殷勤寄與舊游

鶯燕水流雲散 滿羅衫是酒香痕凝處唾碧啼紅相  
半只恐梅花瘦倚夜寒誰暖不成便沒相逢日重整釵  
鸞箏鴈但何郎縱有春風詞筆病懷渾嬾

蠟梅香

吳師孟

錦里陽和看萬木凋時早梅獨秀珎館瓊樓正絳趺初  
吐穠華將茂國豔天葩真淡竚雪肌清瘦似廣寒宮鉞  
華未御自然粧就 凝睇倚朱欄噴清香暗度易襲襟  
袖好與花為主宜秉燭頻觀泛湘酎莫待南枝隨樂府

新聲吹後對賞心人良辰好景須信難偶

前調

喻明仲

愛日初長正園林纔見萬木凋黃檻外朝來已見數枝  
復欲掩映回廊賜與東皇付芳信粧點江鄉想玉樓中  
誰家豔質試學新粧 桃杏苦尋芳縱成蹊豈能似恁  
清香素豔妖嬈應是晝夜曾與明月風光瑞雪冰霜渾  
疑是粉蝶輕狂待拚吟賞休聽畫樓橫管悲傷

秋宵吟

越調

姜白石

古簾空墜月皎坐久西窓人悄蛩吟苦漸漏永丁丁箭  
壺催曉引涼颼動翠葆露脚斜飛雲表因嗟念似去國  
情懷暮帆烟草帶眼銷磨為近日愁多頓老衛娘何  
在宋玉歸來兩地暗縈繞搖落江楓早嫩約無憑幽夢  
又杳但盈盈泪洒單衣今夕何夕恨未了

東風第一枝

春雪

史達祖

巧沁蘭心偷黏草甲東風欲障新暖謾凝碧瓦難留信  
知暮寒較淺行天入鏡做弄出輕鬆纖軟料故園不捲

重簾悞了乍來雙燕  
青未了柳回白眼紅欲斷杏開  
素面舊游憶著山陰後盟遂妨上苑寒爐重暖便放慢  
春衫針線恐鳳靴挑菜歸來萬一灞橋相見

二

草脚愁蘇花心夢醒鞭香拂散牛土舊歌空憶珠簾綵  
筆倦題繡戶粘鷄貼燕想立斷東風來處暗惹起一掬  
相思亂若翠盤紅縷  
今夜覓夢池秀句明日動探花  
芳緒寄聲沽酒人家預約俊游伴侶憐他梅柳怎忍後

天街酥雨待過了一月燈期日日醉扶歸去

三

酒館歌雲燈街舞綉笑聲喧似簫鼓太平京國多歡大  
酺綺羅幾處東風不動照花影一天春聚耀翠光金縷  
相交苒苒細吹香霧羞醉玉少年丰度懷豔雪舊家  
伴侶閉門明月闌心倚窓小梅索句吟情欲斷念嬌俊  
知人無據想袖寒珠絡藏香夜久帶愁歸去

錦堂春

司馬光

青箱  
雜記

紅日遲遲虛廊轉影槐陰迤邐西斜彩筆工夫難狀晚  
景煙霞蝶尚不知春去謾遶幽砌尋花奈猛風過後縱  
有殘紅飛向誰家始知青春無價笑飄蓬宦路荏苒  
年華今日笙歌叢裏特地咨嗟席上青衫濕透箒感舊  
何止琵琶怎不教易老多少離愁散在天涯

再會

柳耆卿

墜髻慵梳愁蛾懶畫心緒是事闌珊覺新來憔悴金縷  
衣寬認得這疎狂意下向人誚譬如閒把芳容整頓恁

地輕辜爭忍心安 依前過了舊約甚當初賺我偷剪  
雲鬟幾時得歸來香閣深闌待伊要无雲帶雨纏繡衾  
不與同懽儘更深款款問伊今後敢更無端

雪梅

梅苑

臘雪初晴冰銷凝泮尋幽開賞名園向長亭登眺倚徧  
朱欄拂面嚴風凍薄滿堦前霜葉聲乾竟小臺深處數  
葉江梅漏泄春權 百花休恨開晚奈韶華瞬息常放  
教先非是東君私語和煦恩偏欲寄江南音耗念故人

隔濶雲烟一枝贈春色待把金刀剪倩人傳



花草粹編卷十九